
ФАРҒОНАДА БАРПО ЭТИЛАДИГАН ЭКОШАҲАРНИНГ ДАСТЛАБКИ ЛОЙИҲАСИГА СТАРТ БЕРИЛДИ

Маълумки, жорий йилнинг 16 август санасида Фарғонада 300 гектар майдонда 40 минг аҳолига мўлжалланган Экошаҳар ҳамда 24 минг ишчи ўрни яратиладиган кичик саноат ҳудуди барпо этилиши ҳақида вилоят ҳокимлиги ахборот хизмати томонидан хабар берилган эди.

Бугун вилоят ҳокими Хайрулло Бозоров Фарғона шаҳри ва тумани туташган жойда, Халқаро аэропорт яқинидаги “Илғор” МФЙ да барпо этилаётган ушбу манзилда бўлиб, бу ерда яна бир муҳим лойиҳа, шаҳар ўртасидан оқиб ўтувчи ва яқин келажакда қарийб 10 гектар майдонни эгаллаши режалаштирилган истироҳат боғининг ўзига хос кўрки ва яшил майдонларнинг озуқа манбаи бўлувчи янги канал қуриш лойиҳасини кўрди.

Вилоят раҳбари вилоят прокурори Бахтиёр Исмоилов ва шаҳар ҳокими Мирзоҳид Убайдуллаев ҳамроҳлигида Фарғона тумани Шодиева каналидан сув олувчи янги сув тармоғини қуриш жараёнлари юзасидан муҳандислар, қурувчилар билан суҳбатлашди. Бўлажак каналнинг узунлиги 4,5 километр, эни 6 метр, чуқурлиги эса жойнинг нишаблигига қараб 1,5-2 метр атрофларида бўлиши, секундига 3 кубометр сув ўтказа олиши мақсадга мувофиқ деб белгиланди.

Вилоят раҳбари қурилиш ишларида қатнашаётган ишчи-ҳодимларга барча қулай шарт-шароитлар яратилиши, уларнинг озиқ-овқат таъминоти яхши бўлиши, ойлик маошлари ўз вақтида бериб борилиши зарурлигини алоҳида таъкидлади.

Айни пайтда шаҳар ҳокими ва мутасаддиларига янги барпо этилаётган Экошаҳарда ҳам, Фарғона шаҳридаги кўп қаватли турар жой бинолари орасида ҳам дарахтларни кўпайтириш чора-тадбирларини кўриш топшириғи берилди.

Имом-хатиб иштирокида дуолар қилиниб, юртга тинчлик-осойишталик, элга қут-барака, амалга оширилаётган ишларга ривож тиланди.

Бизни ижтимоий тармоқларда кузатинг [Facebook](#),
2021-09-13 11:02:10